



# PERSEVERA

Un página di kurashámentu i guia spiritual pa miembronan di Scouting Antiano



Mart 2013

Edishon 26 Aña 3

## KUARESMA

Kuaresma ta un tempu di arepentimentu i penitensia. Den su transkurso, Iglesia ta invitá tur fielnan pa nan rekonosé nan faltanan i repentí di nan.

Pero promé ku esei Iglesia ta orientá i guia nos, pa nos no kometé ningun akto di kua despues nos mester keda arepentí.



Hopi hende ta pensa ku no tin mester di temporada di kuaresma, ku no ta nesario ni konfeshon ni ayuno, ni Eukaristia pa yega na Señor.

Tin ku ta bisa ku pa papia ku Señor ta suficiente pa para bou di un palu i bisa kualkier kos i kla.

E sorto di hende aki ta biba un fantasia, un infantilismo pa motibu di miedu i komodidat; nan sa mucho bon ku pa logra algu grandi den bida nan tin di hasi hopi sakrifisio.... pero.... sakrifiká pa haña Señor? Nan no kier sa nada di sakrifisio ni ayuno sino gosa, bebe, kome i fiesta. Anto ora di muri un gran funeral i bai stret manera un raket na shelu. Sòri, e no ta bai asina. Ora Hesus a drenta den desierto E a proponé, na esnan ku ta rekonosé Su stèm, algu radikal, E a proponé nan pa kibra ku tur komodidat i mortifiká nan kurpa pa medio di ayuno i penitensia. Kuaresma ta e temporada ku Dios ta pone nos dilanti pa nos busk'é, meskos ku Su Yu a hasi durante 40 dia! Dios mes ta hasi penitensia! , i nos nò?

For di siglo IV kristiannan a kuminsá uni durante e temporada aki pa praktiká ayuno i apstinensia ku e ophetivo di renobá kada aña henter e Iglesia Katóliko. Un renobashon ku ta kuminsá den kurason di hende i ku no ta kaba e mes un dia sino ku e ta dura un bida largu. E ta un spiritu di retiro kolektivo kaminda nos ta biba pa 40 dia e retiro di Hesus den desierto i nos ta prepará nos mes pa e selebrashonnan di Pasku ku ta kulminá ku e solemnidad mas grandi di tur: **Resurekshon di Señor.** P'esei, penitensia ta nesario pa prepará bo pa e kambio di bida ku ta warda bo un bes aki; penitensia ta e yabi pa kombershon. Tur kristian tin obligashon di hasi penitensia, manera Hesus a hasi, i ta apstené di kome karni tur djabièrnè di aña i tambe durante djarason di shinishi i djabièrnè Santu.

Si bo arepentimentu i penitensia ta berdadero, lo e no ta keda den palabra so sino ku e lo manifestá eksteriormente den obranan di misericòrdia i komo resultado di esaki bo kondukta ta kambia tambe pa imitá mas i

mas e mansedumbre di Señor ku a soportá tur sufrimentu, pa bo! Bo kier Gloria di Hesus pero sin kuaresma? Si kunÉ nos kier biba, kunÉ tambe nos tin di muri. Ora bo mortifiká bo kurpa ku ayuno di kosnan ku bo gusta, ora bo no ta rechasá e kosnan di mundu ku ta duna bo plaser, bo ta ripará kon bashí bo bida ta i kuantu bo ta deseá di ta felis. E ora ei bo ta drei bo kara pa Señor i bo ta buska ardentemente e felisidat ei ku tantu bo ta deseá den Señor! pasobra bo a deskubrí ku nada otro por hasi bo felis. Ayuno i penitensia a habri bo wowo. E no ta fásil pero e deseo di buska amor di Dios ta mas fuerte ku morto mes, pa esnan ku berdaderamente kier buska Dios i no e popularidat di Dios.

Ruman stimá, sea konsiente i no bisa ku bo no mester di kombershon, wak bon ku nos bida ta pasa manera leli di kampo i morto ta warda nos na buelta di skina. Sea prudente manera San Bernardo ta siña nos i kombertí, rekonsiliá bo mes ku Dios, alehá for di malu, sera bo amistad ku Señor i konfes'é tur e pikanan ku bo tin riba bo konsenshi. Ora bo hasi esaki bo ta laga Hesus traha den bo i E lo transformá bo kurason di piedra den un kurason di karni ku por stima i sakrifiká su mes pa próhimo.

Si bo ta wak bon, kiko un tiki ayuno, òf e pió di penitensianan ta kompará ku e Gloria ku nos kier? Tur nos penitensia ta nada kompará ku loke Hesus a sufri, sin embargo, ku e tiki ei ku nos ta hasi, Hesus ta hasi milagernan manera E a hasi ku e dos piska i e sinku pan. Kòrdá semper.....

**"no tin shelu sin Kuaresma."**

